

**Kalaallit Nunaannut aamma Kalaallit Nunaannit tunniussineq pillugu inatsit pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.**

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

### **Akissuteqaat**

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

### **Aappassaaneerinnineq**

Naalakkersuisut Inatsisinut Ataatsimiititaliaq qutsavigaagut, Inatsisartut aalajangiiffigisassaattut siunnersuummut matumunnga peqqissaartumik suliaqarsimanerannut.

Siullermeerinninnermi oqaatigisattut, iliuutsiminnut akisussaatinneqarnissaaq imaluunniit pillaatiasiamik eqqartuussutigineqartumik atuinissamik pinngitsoortitsinissaaq anguniarlugu nunanit allamiunit pinerluttuliortunit Kalaallit Nunaata qimarravigineqannginnissaata qulakkeerneqarnissaa pingaaruteqarpoq. Tunniussisarneq pillugu nunat tamat akornanni inatsisitigut suleqatigiinnermut uagut killissarititatta ullutsinnut naleqquttuunissaat, naammattuunissaat aamma Kalaallit Nunaanni pissutsinut naleqqussarneqarsimanissaat, tassani piumasaqaataavoq.

Aaqqissuussinerup nutaap tunniussinissaaq pillugu suliat suliarineqartarnerannut sunniuteqarluarnerusumik ilapittuutaanissaa aamma aalajangiisinnaanernut piginnaatitaanerup Kalaallit Nunaanni eqqartuussivinnut nuunneqarneratigut inatsisitigut isumannaatsuunerup patajaallisarneqarnissaa naatsorsuutigineqarpoq.

Inatsisinut Ataatsimiititaliap oqaaseqaatai Inatsiseqarnermut ministereqarfimmut ingerlateqqissavakka.

Taama oqaaseqarlutik allanillu oqaaseqaqqigatik siunnersuut aappassaaneerneqarnissaanut Naalakkersuisut tunniuppaat.